

**Evangelium vun der Ouschternuecht  
a vun Ouschteren (am Dag) (Joer A)**

**Mt 28,1-10**

- 1 Wéi et deen éischten Dag vun der Woch,  
also den Dag nom Sabbat,  
hell ginn ass,  
sinn d'Maria vu Magdala an déi aner Maria nom Graf kucke gaang.
- 2 An hei, op eemol huet de Buedem ugefaang, ferm ze zidderen:  
Dem Här säin Engel ass nämlech vum Himmel erofkomm,  
hien ass dohi gaang,  
huet de Steen ewechgerullt an huet sech dropgesat.
- 3 Hien huet ausgesi wéi e Blëtz,  
an säi Kleed war wäiss wéi Schnéi.
- 4 D'Wiechter hu geziddert, esou eng Angscht haten si virun him,  
an si ware wéi dout.
- 5 Dunn huet den Engel zu de Frae gesot:  
"Fäert net!  
Ech weess, dir sicht de Jesus, dee Gekräizegten.
- 6 Hien ass net hei:  
Hien ass aus dem Doud erwächt ginn, esou wéi hie gesot hat.  
Kommt heihinner, kuckt d'Plaz, wou hie louch!
- 7 An da gitt séier a sot senge Jünger:  
'Hien ass aus dem Doud erwächt ginn!  
Hie geet iech viraus a Galiläa;  
do kritt dir hien ze gesinn.'  
Kuckt, ech hunn iech et gesot!"
- 8 Huerteg sinn si vum Graf fortgaang,  
voller Angscht, ma och mat grousser Freed,  
an si si gelaf, fir de Jünger et ze verzielen.
- 9 A kuck, de Jesus ass hinne begéint

a sot: "Freet iech!"  
Si sinn op hien duergang,  
hunn sech virun him niddergehät  
an hunn hien ugebiet.

<sup>10</sup> Du sot de Jesus zu hinnen:  
"Fäert net!  
Gitt a sot menge Bridder,  
datt si a Galiläa goe sollen;  
do kréien si mech ze gesinn."